

Lajčák: Zapošljavanje državnih službenika na osnovu njihovih kvalifikacija i sposobnosti je evropska praksa

Visoki predstavnik i specijalni predstavnik EU Miroslav Lajčák danas je uputio pismo Kolegiju Zastupničkog doma Parlamentarne skupštine BiH u vezi s njihovom namjerom da na sjednici zakazanoj za 5. novembar 2008. godine po hitnom postupku razmatraju prijedlog Zakona o izmjenama Zakona o državnoj službi u institucijama Bosne i Hercegovine. Ova izmjena se u suštini odnosi na promjenu sastava Komisije za odabir državnih službenika.

Prvobitni sastav Komisije za odabir državnih službenika izmijenjen je u julu 2005. godine, nakon temeljite analize implementacije Zakona o državnoj službi koju je provela nezavisna revizorska kuća koju je angažovao USAID. Sastav Komisije za odabir je tada izmijenjen upravo da bi se ograničio politički uticaj i kontrola nad procesom zapošljavanja državnih službenika, te da bi se ojačala uloga Agencije za državnu službu. Postojeći sastav – dva državna službenika iz institucije o kojoj je riječ i tri nezavisna eksperta sa liste eksperata Agencije za državnu službu – osigurava objektivniju proceduru odabira kandidata na osnovu njihovih kvalifikacija i sposobnosti, a ne na osnovu njihove stranačke odnosno etničke pripradnosti, čime se doprinosi objektivnijoj, profesionalnijoj, efikasnijoj i stručnijoj procjeni kandidata.

Prijedlog o kojem će se raspravljati 5. novembra zapravo predstavlja vraćanje na staro i ponovno uvođenje većeg stepena političkog uticaja na proces zapošljavanja državnih službenika. Ukoliko budu usvojeni, ovi amandmani će biti u suprotnosti sa duhom zahtjeva evropskog partnerstva. Visoki predstavnik je apelovao na Kolegij da povuče ovaj prijedlog Zakona iz parlamentarne procedure kako bi proces zapošljavanja državnih službenika ostao profesionalniji, zasnovan na kvalifikacijama i sposobnostima kandidata, te se odvijao bez političkog uticaja.